

obsedit, ut *INDRÆ* inimicus *VISHNUIS* habitationem, quæ splendorem a *BALI* datum accepit.

33. Juvenis ille, ministro patrio cum multis militibus uxoris custodiam committens, regum cohortem excepit, sicut *Sonas* fluvius tumidis undis fluvium cœlestem, *Bhágí Rathim*.

34. Pedes peditem adoriebatur, curru vectus currus heroem, equo vectus equo insidentem, elephantum dux elephanto vectum. Singuli similes adversarios eligebant in prælio.

35. Tubis strepentibus sagittarii, quorum voces distingui non poterant, non stirpium suarum nomina exclamabant, sed litteris in sagittis scriptis nomina sua nobilia mutuo sibi indicabant.

36. Pulvis, in certamine ab equis excitatus, currum orbibus densatus, elephantorum aurium ictibus dispersus, veli instar solem involvebat.

37. Vexilla pisciformia, oribus venti vehementia apertis, densum pulverem ab agminibus excitatum bibentes, apparebant veluti pisces veri, recentes aquas turbidas bibentes.

38. Cognoscebatur currus rotarum strepitu, elephanti tintinnabuli agitati sono, ipsique milites, ducis sui nomine exclamato, in denso pulvere se invicem distinguebant.

39. In diffusis hisce pulveris tenebris, oculorum viam obstruentibus, cruoris flumen, ex equorum, elephantorum et militum vulneribus manans, soli recens orto similis erat.

40. Pulvis ille, cruore a solo abscissus, superne vento agitatus, apparebat veluti fumus ortus ex igne, cujus carbones ardentes soli remanserunt.

41. Curru vecti, simulac torpor ex ictu ortus cessaverat, aurigas suas in curru stantes increpantes, equis retro actis, eum, a quo percussi fuerant, vexillo recognoscentes, furore adoriebantur.

42. Sagittariorum sollertium sagittæ, quamquam in media via per sagittam inimicam dissectæ, ob ipsarum celeritatis impetum vel anterioribus partibus, cuspide munitis, metam attingebant.

43. Elephantorum congressu ducum capita, quamquam per discos, nova-